

quod tamdiu stringit, quamdiu ratio et convenientia aliud non permittit; tum quia nimia indulgentia foveat scelera, præbetque ansam delinquendi. Nec jure aggratiandi, quoad pœnam capitalem, nisi moderate admodum, uti oportet, ne sceleris impunitas ad sequelam trahat alios. Imo passim utendo jure aggraliandi peccare potest Princeps graviter in Rempublicam, cui se obligavit ad prestandam securitatem, quantum potest, in vita, bonis, etc. adeoque ad tollendos Reipublicæ noxios, facinorosos homines; qui non satis cohiberentur metu mitioris tantum pœnae, si pœna capitalis sit facilis condonatio.

622. Obj. I. Tenetur, quicumque cum summo imperio præest Reipublicæ ex pacto primævo cum Republica inito, ad ejus procurandam tranquillitatem et securitatem adhibere media necessaria, ac proinde in illius violatores condignis pœnis animadvertere, ut ab his nihil metuendum sit Reipublicæ; ergo jure naturali obstringitur Princeps, criminis capitalis reos punire pœna capitali, maxime homicidas; quia nihil publicæ securitati ita contrarium, quam occidendi facultas. *Conf.* Et vero homicidiam voluntarium esse pœna capitali plectendum ipsa naturalis ratio videtur insinuare; ex naturæ enim dictato, ut ait in hunc locum Gror. *Tit. 1. Crit. Sacr.* Cainus, occiso fratre, inferebat: *Omnis igitur, qui invenerit me, occidet me.* Gen. 4. 13.

II. Homicidam voluntarium occidendum esse, jus divinum statuit; ergo, hoc casu, non est locus juri aggratiandi; cum, quacumque potestate gaudeat summus Princeps, juri tamen divino semper est, et manet subditus. *Prob. Ant. Gen. 9. 6.* ait Altissimus: *Quicunque effuderit humanum sanguinem, fundetur sanguis illius.* Quæ lex renovatur Exod. 21. v. 12. et seqq. ac Num. 35. v. 16. *reus homicidii, et ipse morietur;* perque sequentes textus diserte prohibetur, ne multa pecuniaria exigatur ab homicida; sed statuitur, quod ipse debeat mori.

III. Adstipulatur lex nova non obscure Matth. 26. v. 52. *Omnes, qui acceperint gladium, gladio peribunt.* Aperti ex Apoc. 13. v. 10. *Qui in gladio occiderit, oportet eum gladio occidi;* ergo.

Ad 1^{um}. R. N. Simpliciter; vel ad summum *D. Cons.* Si alio modo procurari tranquillitas et securitas non posset *C.* si possit, uti alio modo procurari adhuc potest *N.* Vi pacti primævi cum Republica inito tenetur Princeps Reipublicæ, quoad potest, procurare tranquillitatem, et securitatem in vita, et bonis; sed non tenetur per unum determinate medium vi ejus pacti; ubi enim pactum illud? Cum igitur mediis, et pœnis aliis, quam capitali, possit euendem obtinere finem; non obligatur cumdem procurare præcise infligendo pœnam capitalem. Aliud foret, si alio medio jam moraliter ille finis haberi non posset; sed propterea jam diximus, uti pœna non debet facile remitti ex integrō, sic jus ipsum aggratiandi esse moderate usurandum. Pariter ex jure naturæ antecedenti etsi inferatur, delicta punienda esse; determinatus tamen puniendi modus ex eo inferri nequit.

Ad Conf. R. 1^o. At nihilominus Deus Cainum occidi severe prohibuit. Ibid.

R. 2^o. Inde ad summum sequitur, non inique agere Principem, interficiendo homicidam; minime vero, quod interficere vi præcepti naturalis debeat.

Ad 2^{um}. R. Leges judiciales testamenti veteris per Christum abolitæ sunt, neque nunc amplius stringunt; ergo inepte illæ huc afferuntur.

Ad 3^{um}. N. ass. Ad prob. R. Christum hæc dixisse ad mentem legum judicialium Judeorum, que tum temporis, nondum promulgata lege nova nondum erant abolitæ, ut sensus sit: *Lex vult, ut, qui occiderit gladio, similiter occidatur;* ut dicitur cit. loc. in object. 2^a. præsertim Num. 33. 16. *Si quis ferro percusserit, et mortuus fuerit qui percussus est: reus erit homicidii, et ipse morietur.* Estque is obvius verborum Christi sensus. Non igitur hic fertur lex nova observanda in lege evangelica.

Ad Conf. N. Cons. Non enim hic sermo est de modo in judiciis humanis observando; sed juxta litteram ibi consolatur, erigisque servos Christi propter hunc vexatos, ut patientes persecutiones superent, ipsos liberandos esse; malis intentatis contra in auctorum capita Dei judicio redundaturis; postquam enim dixisset: *Qui in captivitatem duxerit, in captivitatem vadet; qui in gladio occiderit, oportet eum gladio occidi;* tum subdit: *hic est patientia, et fides Sanctorum.*

ARTICULUS III.

POSSITNE JUDEX JURIDICE PROBATUM REUM, QUEM TAMEM PRIVATA SCIENTIA SCIT INNOCENTEM, CONDEMNARE IN CAUSIS CRIMINALIBUS?

633. In hac controversia convenit inter omnes, judicem eo casu teneri ex justitia, tentare media licita omnia ad liberandum innocentem, inveniendo causas ad repellendam accusationem injustam; summa dexteritate examinando testes, dum dissentientes faciat exemplo Danielis, dissimulando custodiā carceris; remittendo causam ad superiorē judicem, etc. verbo: præstanto, quæ potest, ne opprimatur innocentia. His vero nihil proficienibus, queritur, debeatne, ac possit tunc condemnare probatum reum, quem scit innocentem? Affirmativam sententiam passim amplectitur schola Doctoris Angelici. Negativam in causis criminalibus majoribus, ubi de pœna mortis et mutilationis agitur, tueruntur LESS. LAVM. HAUN. PYRRH. aliquique, non tamen in minoribus, ubi de sola exilio pœna vel afflictiva duntaxat corporis, privatione officii, etc. agitur, nec in civilibus. E contra rursum utrobique negant ABB. KOENIG. GORM. PICHLER; quibuscum

634. Dico. Nulla in causa tenetur, aut potest judex condemnare juridice probatum reum, quem scientia privata scit esse innocentem.

Prob. Nullum jus, sive naturale, sive divinum, sive humanum dat facultatem judicii, condemnandi probatum reum, quem scit, esse innocentem; sed potius id prohibent jura singula; ergo.

Prob. Ant. 1^o. de jure naturali. Jus naturale, ipsaque justitiae natura, tam commutativæ, quam vindicativæ exigit æqualitatem et proportionem inter solutionem et obligationem, pœnam et culpam: sed nulla est æqualitas inter solutionem veram et obligationem nullam; nulla proportio inter pœnam veram et culpam nullam; ergo.

2^o. Nec *jus divinum* hoc permittit; ubi enim tale extat? Certe si scrutemur *jus divinum* V. T. contrarium reperimus Exod. 23. v. 1. *Non suscipes vocem*

mendacii. Et v. 2. Non sequeris turbam ad faciendum malum; nec in *judicio*, plurimorum *acquiesces sententiæ*, ut a vero devies. Respondent adversarii, hic prohiberi *judici*, ne se jungat testibus mendacibus, occidatque, vel condemnat eum, qui *juridice probatus est innocens*. At hæc responsio videtur adversari litteræ; quomodo enim *juridice probatus est innocens*, ubi plurimorum contra sunt *testimonia*? Sed neque aliquid ex T. N. pro condemnando tali innocentia potest erui, ut constabit solutione objectionum.

3º. Nec *jus humanum* hanc facultatem *judici* tribuit; sed potius prohibet. Nam 1. *Jus Canonicum c. 1. de sent. et re jud. in 6. præcipit*, ut judges Ecclesiastici procedant secundum *conscientiam et justitiam*; cum aeterni tribunal *judicis reum non habeat*, quem *injuste judex condemnat*: ac demum generaliter vult, eos *præ oculis habere solum Deum*. Sed nec secundum *conscientiam*, nec *justitiam*, *judex* condemnaret hunc innocentem; nec eum aeterni tribunal *judicis* habet *reum*; nec in eo condemnando *præ oculis habebet Deum*, sed *mendacium*, et *calumniam*. Respondetis forsitan, quod aeterni *judicis* tribunal etiam *habeat reum illum*, non quidem pro interno, sed externo *foco*. At sane concipi non potest, quomodo aeterna *Veritas*, aeterna omnis rectitudinis origo et regula possit innocentem pro ullo *foco* *habere reum*, qui talis præcise *probatus mendacio et calumnia*?

2. *Jus civile* vero, dum præcipit, ut *judex* procedat secundum *allegata et probata*, ideo præcise ita ordinat, ut *judici* constet de veritate, ac removetur, quoad fieri potest, *periculum*, ne alias in *sententia* ferenda *præjudicet* veriori causæ, ut constat ex L. 6. ff. de off. *Præs. ubi*: *Præses provinciae id sequatur, quod convenit eum ex fide corum, quæ probabuntur, ne veritas vicietur erroribus*; dum ergo *judici* de veritate constat, quæ sola est finis *legum*, dum volunt adduci *probationes*, *testes*, etc. sane dici non potest, *judicem sequi testes falsos*; ne, dum has cautelas statuit in bonum innocentis, hic per easdem opprimatur contra R. J. 61. in 6. Deinde Nov. 90. de *testib.* jubetur *judex* excutere diligenter fidem *testium*, rejicere *testes suspectos*, etc. Qua ratione igitur quis *præsumet*, velle *jus*, ut *judex sequatur testes falsos, mendaces?* Porro per L. 29. ff. de *probatis*, *veritas fortior est præsumptione descendente ex actis et probatis publicis*; ergo haud dubie fortior erit mendaciis et calumnia.

Conf. 1. *Judex* nequit sequi *sententiam probabilem relictam probabiliori*, *juxta prop. damnatam*; ergo *multo minus falsam relictam certa*.

Conf. 2. Nec *judici*, nec *Reipublicæ concessum est jus directe in vitam innocentis*; ergo nullo casu licet *judici* vel *Reipublicæ* hunc spoliare vita.

633. *Obj. I.* Lex naturalis et divina prohibit solum, occidere innocentem *ex intentione*, non vero *præter intentionem*, exercendo rem licitam, et fungendo debito officio, ut patet ex *occisione invasoris materialiter injusti*, et *eversione turris*, in qua simul cum hostibus degunt innocentes. Itēm, *jus naturæ et divinum prohibit solum*, occidere innocentem de facto, et jure; non vero innocentem de facto, et *reum de jure*, qualis est, qui *probatus est reus*.

II. Juxta Deut. 17. v. 6. *In ore duorum, aut trium testium peribit, qui interficietur*: ac cap. 19. v. 13. *In ore duorum, aut trium testium stabit omne verbum, quod Christus repetit Matthi. 18. v. 16.*; ergo.

III. Juxta S. AMBROS. serm. 20. in Ps. 118. relatum *Can. Judicet. Caus. 3. q. 7.* *Bonus judex nihil ex arbitrio suo facit, et domesticæ proposito voluntatis; sed iuxta leges et jura pronunciat... nihil paratum et meditatum domo defert; sed sicut audit, et judicat.* Et S. AUGUSTIN. Lib. de Pœnit. c. 3. relatum *Can. quamvis. Caus. XI. q. 3.* *Quamvis vera sint quædam, non tamen judici sunt credenda, nisi certis indicis demonstrentur.* Ergo.

IV. Per c. *Pastoralis*. 28. §. *quia vero. de offic. et Potest. Jud. deleg. præcipitur judici*, cui demandatur *executio sententiæ*, ut hanc exequatur, licet sciat esse *injustam*; ergo idem facere debet *judex* in nostro casu.

V. *Jura generaliter volunt decidi causas secundum allegata et probata*, L. 6. ff. de offic. *Præs.*

VI. *Judex fungitur persona publica*; ergo in decidendis causis sequi debet *scientiam publicam*, quam habet ex *allegatis et probatis*; non vero *opinionem suam privatam*, aut *scientiam facti*. *Conf. Judex sustinet personam Reipublicæ*; ergo debet *judicare*, sicut *judicaret Republica*: atqui hæc *judicaret secundum scientiam publicam*; in *Republica* enim non datur *scientia privata*, cum omnis *scientia Reipublicæ* tanquam *communitatis sit publica*, hæc vero si adsit, non est necessaria discussio *testium*.

VII. *Republica* *habet dominium altum in bona subditorum*, vi cuius de his potest disponere ad *exigentiam boni publici*: atqui hoc exigit *condemnari etiam innocentem*, quando *probatus est reus*, quia alias daretur *ansa judicibus*, ut se corrumpi sinerent, ut *impunitos dimittant malefactores sub prætextu innocentiae*.

VIII. *Judex* potest, ac debet absolvere *eum*, qui publice per *testes probatus est innocens*, etiamsi *privata scientia* *eum noverit esse reum*; ergo etiam a contrario.

IX. Quid enim aliud faceret *judex*, quando aliud medium liberandi innocentem nihil proficit? An cedat officio? at hoc nimis durum est; præsertim si sit *judex supremus*; quem, ut potius cedat regno, vel imperio, nemo obligabit cum tanto *Reipublicæ* *damno*.

636. *Ad 1^{um}. N. suppos. part. 1^{ae}.* quod in praesenti casu *judex occidat solum præter intentionem*, exercendo rem licitam ac fungendo officio, innocentem; cum innocentem occidere sit intrinsece malum, omniaque prohibeant jura; ergo directe hunc occideret. Unde disparitas est 1º. quoad aggressorem materialiter *injustum*; quia, etsi solum sit materialiter nocens, ut furiosus, amens, ebrius, etc. ob defectum rationis; vere tamen nocens est; ergo cum quilibet *jus habeat tuendi vitam*, licite, servato moderamine inculpatae tutelæ, dum vita propria aliter servari non potest, talis aggressor solum materialiter nocens occiditur. 2º. Quoad dejectionem turris; quia *occisio innocentum est per accidens*, nec directe intenta ab expugnatore belli duce, qui directe intendit expugnationem urbis, et turris hostilis, ex qua solum per accidens et indirecte contra intentionem ducis sequitur mors innocentis. Econtra in nostro casu *sententia judicis nullum habet objectum immediatus*, in quod tendat; ergo directe tendet in cædem innocentis, quod nunquam licet; codem enim modo tendit *judex condemnans*, quem scit innocentem, ac condemnans, quem scit nocentem. Nec dici potest, quod *judex directe intendat servare præscriptam juris formam*, unde præter ejus

intentionem, indirecte sequitur mors innocentis; nam tota illa iudicij forma est constituta, ne vitietur veritas; in favorem innocentiae, ne haec opprimatur; ergo haec non potest esse objectum immediatum sententiae condemnatoriae innocentis, ne contra R. J. 61. in 6. quod est in alicujus favorem concessum, in ejus retorqueatur dispendium. Quod si tamen adhuc intentionem extrinsecam fingas; se pariter excusabit Pilatus, quod condemnando Christum intenderit directe impedire tumultum populi.

Ad 2^{am}. part. N. suppos. quod jura velint haberi reum, qui talis solum probatus a testibus falsis. Constat ex dictis in Concl.

Ad 2^{am}. R. N. Cons. Etsi enim dicatur verbis affirmativis: in ore duorum, vel trium testium peribit... stabit omne verbum: sensus tamen negativus est, quod plures testes non sint necessarii; unus vero non sit sufficiens, ut feratur sententia condemnatoria. Constat ex Exod. 23. v. 2. ubi: *nec in iudicio plurimorum acquiesces sententiae, ut a vero devies. v. 7. mendacium fugies.* Si igitur contra veritatem in iudicio plurimorum maligna testimonia jubeantur rejici, quomodo in ore duorum, vel trium falsorum testium continuo peribit, dum iudicii constat de innocentia?

Ad 3^{am}. R. N. Cons. Ambo enim loquuntur de eo, quod ordinarie fit, quando iudicii non constat de veritate; nec aliud sensus utrique canonii tribui citra figmentum potest; nam in primo immediate subditur ex S. AMBR. et sicut se habet negotii natura, decernit... examinat causa merita, non mutat... in iudicando magis cordi sit veritatis custodia; ergo hanc praevalere vult. In altero hunc sensum esse Rubrica demonstrat: *non credantur, quae certis indicis non demonstrantur;* quomodo igitur credantur, quae non nisi mendacis demonstrantur?

Ad 4^{am}. R. N. quod possit exequi sententiam certo ac notorie injustam. Alioquin excusabis Christi ac Martyrum carnifices; ac aliunde certum est, magis obediendum esse Deo, prohibenti omnem injustitiam, quam homini praecipienti injustum. Unde to sciat a Pontifice latius sumitur pro opinione, quando sententia non est notorie injusta: ut colligitur ex eod. c. dum inquit: *mandatarii non esse, examinare sententiam, cuius ipsi executio tantum demandatur.*

Ad 5^{am}. R. D. Quando iudicii aliunde de veritate non constat C. secus N. Jubetur hanc formam sequi, ne vitietur veritas. Non igitur si haec vitiaretur, ac opprimeretur innocentia.

Ad 6^{am}. R. D. Est persona publica ratione officii C. ut sequatur errorem, mendacium, calumniam, quam scit alteri impingi N.

Ad Conf. R. Sophisma hoc seipsum jugulat, vel nimium probat; si enim iudex sustineat personam Reipublicae ac iudicare debeat, sicut ipsa iudicaret Respublica; haec vero iudicaret juxta scientiam publicam, cum Reipublicae scientia sit publica; ergo etiam, quando Reipublicae constaret de veritate et innocentia, secundum hanc scientiam publicam iudicaret: sed quomodo hoc casu iudicaret? condemnando? minime; ergo nec iudex hic iudicare debet. Unde D. min. subs. Sed Respublica iudicaret secundum scientiam publicam condemnando, quando non constaret Reipublicae de veritate C. si constaret de veritate N. Sed si constaret Reipublicae de veritate, secundum hanc scientiam non condemnaret; saltem non posset.

Ad 7^{am}. R. Saltem dominium altum in vitam certo Respublica non habet.

In civilibus quidem habet, sed N. min. cum prob. Talia enim delicta praesumi non oportet; vel pariter dicam, adversariorum doctrinam ansam dare hominibus malevolis, ut perfide conspirent falsis testimonis contra inimicum, si noverint, debere iudicem semper ex officio deferre duorum depositioni testimoniū. Deinde hoc periculum corruptionis non habet locum; quia in foro externo ipsi iudicii, asserenti reum publice convictum esse innocentem, non habent fides, nisi id probet.

Ad 8^{am}. R. C. A. N. Cons. Disparitas est: dimittere nocentem, maxime occultum, nulli juri adversatur, nec per hoc ulli infertur injuria: at condemnare innocentem *capitis*, intrinsece malum est; sed et in civilibus adversatur justitia, ipsique legum fini; ac innocentis irrogatur injuria.

Ad 9^{am}. R. In causa capitali, si nullum ex dictis n. 629. succedat (quod tamen vix possibile, ut controversia haec prope sit de casu metaphysico) tum, si iudex inferior sit, potius cedere debet officio: neque hoc nimis durum videri debet, cum vita alterius sit superioris ordinis bonum, ac generaliter nullius boni temporalis vel retinendi, vel acquirendi causa licet committere rem intrinsece malam, qualis est innocentis occiso: si vero iudex supremus sit summus Princeps, poterit sua auctoritate dimittere innocentem liberum; cum vi *juris aggratiandi* possit usque adeo vere reo facere vitæ gratiam; pariter in civilibus potest absolvere, quem certo scit innocentem, cum summus Princeps his legibus de forma iudicij non adstringatur: iudex vero inferior in civilibus, si ipse periclitaretur de officio, nisi condemnaret innocentem, non tenetur tanto suo incommmodo procurare bonum alterius; ac condemnatus, cum hac sententia haud obligetur in conscientia, uti potest compensatione occulta; vel alio tempore resuscitare causam, instituendo processum de novo, etc.

CAPUT III.

DE ACTU JUSTITIE SIVE JUDICIO.

637. *Judicium*, ut hic spectatur, est legitima causæ actorem inter et reum controversæ per iudicem facta discussio, et definitio, arg. c. *Forus. 10. de V. S. L. 9. 13. C. h. t.* Importat data definitio omnes partes principales constitutivas iudicij, et personas necessarias, *causam*, sive, ut dici solet, punctum litis; *iudicem*; *actorem* (in causis criminalibus *accusator* dicitur) qui alteri litem movet; *reum*, non a reatu theologico sic dictum, sed cui lis movetur. Ceteræ personæ, que in iudicio adesse solent, ut assessori, notarii, nuncii et similes, minus principaliter iudicium constituunt; demum *sententiam*, iudicij finem, ac terminum. Dividitur vero a *Jurisconsultis* iudicium præcipue 1º. in *ecclesiasticum*, quod coram iudice ecclesiastico qua tali, quia causa est fori ecclesiastici, agitatur; et *seculare*, quod coram iudice seculari qua tali. 2º. In *ordinarium*, in quo solemnis juris ordo servatur, offerendo libellum, contestando litem, etc. et *extraordina-*